

SAVOGNIN: Canorta d'unfants Tgimirola

Canorta Tgimirola: local, activ e creativ

(comm./pb) Igl team e la nova manadra dalla canorta on sa vivia aint bagn ed er instrado diversas novaziuns: ena cuschiniera creativa, anc dogle peisa locala ed igl rumantsch vign promovia pi ferm.

Igl davos otgover ò Patrizia Plaz antschet ainten la Canorta Tgimirola scu nova manadra ed a parteir digl favrer è Daniela Stamm, la sia substituta. Ella è turnada digl congedi da maternitad. Tottas dus constateschan: igl team è bagn organiso ed ansemens cun la suprastanza èn neidas realisadas diversas adattaziuns.

Products locals, cuschiniar ansemens

Siva digl december ranforza Anne Bonpadre igl team dalla canorta e fò giantar durant treis deis l'emda ansemens cun igls unfants. Agls unfants plai da gidar ad ella ved la cuschnigna ed els trouschan diligentamaintg pastas, paregian verduras e trouschan cun la palotta gronda ainten la vanang. Igls products vignan tant scu pussebel retratgs dad offerents locals: la tgern e la verdura dereivan da bagns purils dalla val, products da latg e caschiell dalla caschareia e fatg las compras vign agl Volg ed agl Spar a Savognin.



En giantar communabel cun igls unfants e la cuschiniera Anna Bonpadre.

Avantatgs, schi ins è indigen

Ena manadra indigena ò blers avantatgs: agl rumantsch so ossa neir do dogle peisa e las canzungs, igls versets ed igls gis an surmiran son neir promovias. Vetiers vign tgi Patrizia Plaz canoscha fitg bagn la val e so uscheia piglier risguard sen igls basigns digls genitours e digls unfants.

Daples unfants ainten la canorta

Siva dalla davosa intervista tgi la Pagina ò fatg cun la Canorta Tgimirola igl aton passo, è igl domber digls unfants survigilos carschia da 19 sen 25. Chegl demossa: la canorta vign stimada scu tgira cumplementara tar las famiglias. Igls unfants visitan la canorta tranter en mez de e quatter deis l'emda. Tiers chegl pon er anc neir reservos deis supplementars - magari durant las vacanzas u schi igls genitours dovran anc ena survigilaziun supplementara.



Agls unfants plai fitg bagn da gidar far giantar. Seia chegl da rasanar la pasta u schiglio da parager las speisas.

La Canorta Tgimirola tschertga per igl 1. fanadour u tenor cunvagnientscha en/a practicant/a scu sustign per igl team. InteressentAs pon s'annunztgier tar la manadra dalla canorta Tgimirola, Patrizia Plaz, Canorta Tgimirola, Veia Naloz 4, 7460 Savognin, tel. 081 684 14 00, tgimirola@laibella.ch, www.laibella.ch.